

ODLUKA BANJALUČKOG SUDA



Niko nije kriv za Medicinsku elektroniku

Okružni sud Banja Luka oslobodio je krivice optužene u slučaju *Medicinska elektronika* koji je otvoren hapšenjem osumnjičenih za nezakonitu prodaju akcija tog preduzeća u centru Banje Luke prije godinu i po dana.

Oslobodeni su većinski vlasnik *Medicinske elektornike* i vlasnik firme *Grand Trejd* iz Banje Luke **Mile Radišić**, bivši direktor *Medicinske elektronike* **Željko Katalina**, te bivši član Nadzornog odbora tog preduzeća **Dragan Cerovac**.

U obrazloženju presude Sud je naveo da Specijalno tužilaštvo RS nije dokazalo navode optužnice, koja je u međuvremenu izmijenjena, pa se akterima u ovom slučaju nije sudilo za organizovani kriminal, već za manipulacije cijenama akcija *Medicinske elektronike*, širenje lažne informacije i zloupotrebu službenog položaja.

Ovakva odluka suda odmah je izazvala političke polemike, a SDS je čak zatražio ukidanje Specijalnog tužilaštva RS jer ne vidi svrhu njegovog postojanja ako, kako je navedeno, *ne može dokazati ni tako očigledan kriminal*.

(s. a.)

KAD LUTRIJA BIH SLAVI

Rođendanske stipendije

Lutrija BiH svojih 60 godina rada i postojanja obilježila je i dodjelom stipendija za 20 studenata putem Udruženja *Obrazovanje gradi BiH*.

Inače, među novitetima kojim obilježava rođendan, *Lutrija* je pripremila i novu igru *SuperLOTO* u kojoj igrači mogu osvojiti svoj prvi milion, a nova web stranica *Lutrije BiH* omogućuje i uplatu online listića. (s. s.)

VELIKO OTKRIĆE U RS

Naplaćivali takse iz SR BiH!

Republika Srpska sve protekle godine primjenjuje Zakon o komunalnim taksama bivše Socijalističke Republike BiH donesen prije čak 34 godine.

Taj zakon iz 1977. godine nije, naravno, mogao da ispuni zahtjeve i potrebe lokalnih zajednica, pa su općine ovu oblast uređivale donoseći svoje odluke o komunalnim taksama.



(s. a.)

FOČA KAO SCHEVENINGEN

Tri miliona za samice

Ministar pravde RS **Džerard Selman** donio je odluku da prva tri osuđena ratna zločinca budu smještena na izdržavanje kazne u *Odjeljenje posebnog režima izvršenja kazne zatvora* u KPZ Foča, koje je time i počelo s radom.

Tri godine je trajala izgradnja i opremanje tog, kako je nazvano, *Scheveningena* u



BiH, u kojem će biti smješteni zatvorenici osuđeni za ratni zločin i druga teška krivična djela, koji bitno ugrožavaju sigurnost ustanova i češći su prekršioći kućnog reda u zatvorima širom RS. Za izgradnju tog posebnog odjeljenja u kojem su i samice, potrošeno je više od tri miliona KM.

(s. s.)

KORPORATIVNE PROMJENE

Messer ima novo ime

Messer Sarajevo Plin d.o.o. u BiH ubuduće posluje



pod novim imenom *Messer Tehnoplin d.o.o.*

Promjena imena došla je kao rezultat potrebe za preciznijim definiranjem djelatnosti kojima se kompanija bavi.

- Sa novim imenom firme nisu se promijenili internet adresa i kontakt-podaci zaposlenika *Messera Tehnoplina* - saopćeno je iz te kompanije. (s. a.)

NISSAN BRINE ZA SIGURNOST

Sigurnosni štiti sve je čvršći

Nissan je predstavio svoje najnovije sigurnosne tehnologije koje će doprinijeti smanjenju broja smrtnih i ozbiljnih povreda u automobilskim nesrećama, a baziraju se na Nissanovom konceptu sigurnosnog štita.



Sistem sprječavanja ubrzanja

pri nehotičnom pritisku papučice gasa i višefunkcijski sistem sa stražnjom kamerom

pomazu vozačima da izbjegnu moguće nesreće zahvaljujući unaprijedenoj tehnologiji obrade signala u kamerama na vozilu, koje omogućavaju prepoznavanje pješaka, drugih vozila, ceste i prepreka oko automobila.

Pored toga, alarmni sistem predviđanja čeonih sudara, koji radarom s milimetarskim valovima prati brzinu vozila ispred, upozorava kad to drugo vozilo naglo smanji brzinu. (s. m.)